

Allannguutissatut siunnersuut

uunga

**Uunga siunnersuut:
Mittarfeqarfiiit A/S pillugu Inatsisartut inatsisaat.**

Pingajussaaneerinninnermut Sanaartornermut Ataatsimiitaliamit saqqummiunneqartoq.

§§-inut 1-imuit 14-imut

1. §§ 1-14 imatut oqaasertalerneqassapput:

” **§ 1.** Aktiaateqarluni ingerlatseqatigiiffimmik Mittarfeqarfiiit A/S-imik taaguutilimmik pilersitsinissamut Naalakkersuisut piginnaatinneqarput. Aktiatigut aningaasaatit Naalakkersuisunit aningasaliissutigineqassapput.

Imm. 2. Ingerlatseqatigiiffik saniatigut allanik taaguuteqarluni suliassaminik ingerlatsisinnaavoq.

§ 2. Suliffeqarfiiup namminersortitap Mittarfeqarfiiit tamakkiisumik ilaannakortumilluunniit akileeqataassutigineratigut aktiatigut aningaasaatinik aningaasaliinissaannut Naalakkersuisut piginnaatinneqarput. Mittarfeqarfiiit pigisaat nalillit ingerlataallu suut akileeqataassutigineqarnissaat pillugu Naalakkersuisut erseqqinnerusumik aalajangersaassapput.

Imm. 2. Akileeqataassutitigut imm. 1-imi taaneqartutigut suliffeqarfimmut aningasaliissutigineqartumut tunngatillugu pisinnaatitaaffiit pisussaaffiilu tamaasa Mittarfeqarfiiit A/S-ip tigussavai.

§ 3. Kalaallit Nunaanni mittarfinnik ingerlatanillu tassunga assingusunik attuumassuteqartunilluunniit piginnituunissaq ingerlatsinissarlu ingerlatseqatigiiffiup siunertaraa.

Imm. 2. Ingerlatseqatigiiffik niuernermi atugassarititaasut tunngavigalugit ingerlanneqassaaq.

§ 4. Mittarfeqarfiiit A/S-imut ileqqoreqqusat taakkunani lu allannguutit Naalakkersuisunit akuerineqartassapput.

Imm. 2. Naalakkersuisut akuersiteqqaarnagit Mittarfeqarfiiit A/S kattunnernut peqataananilu aggulunneqarsinnaanngilaq.

§ 5. Mittarfiit, taakkunani lu napasuliat, tikittarfiiit aallariartortarfiiillu, sannaviit allaffeqarfiiillu, timmisartunut qulimiguulinnullu iniliat il.il. taakkununngalu atatillugu aqqusernit nunaminertanullu pisinnaatitaaffiit, Mittarfeqarfiiit A/S-imut akileeqataassutigineqartut Naalakkersuisut akuersiteqqaarnagit toqqaannartumik toqqaannanngitsumilluunniit tunniunneqarsinnaanngillat, tunineqarsinnaanngillat, piffissami sivisunerusumi attartortinneqarsinnaanngillat

qularnaveeqqusiunneqarsinnaanatilluunniit. Ukiunik marlunnik sivisunerusumik attartortitsinissamik isumaqatigiissutit piffissami sivisunerusumi attartortitsinertut paasineqassapput.

Imm. 2. Pigisat nalillit imm.1-imí taaneqartut akiitsoqarfinnit malersorneqarsinnaanngillat, tamanna qularnaveeqqusiussineq Naalakkersuisunit akuerineqarsimasoq tunngavigalugu pinngippat.

Mittarfeqarfiit A/S-imí piginneqataassutinik tunniussineq

§ 6. Mittarfeqarfiit A/S-imí piginneqataassutinik Kalaallit Airports Holding A/S-imut tunniussinissamut Naalakkersuisut piginnaatinneqarput. Tunniussineq isumaqatigiissuteqarnikkut imaluunniit aningasaatinik qaffaanermut ilagitillugu aningaasaliissuteqarnikkut pissaaq.

Pigisat nalillit ingerlatallu akileeqataassutigineqanngitsut

§ 7. Pigisat nalillit ingerlatallu Mittarfeqarfiit A/S-imut akileeqataassutigineqanngitsut siunissami ingerlanneqarnissaat aserfallatsaalineqarnissaallu pillugit Naalakkersuisut aalajangiissapput.

Imm. 2. Pigisat nalillit ingerlatalluunniit suliffeqarfiup namminersortitap Mittarfeqarfiit ingerlanneqarneranut ilaasimasut namminersortunut pisortalluunniit suliffeqarfiutaannut tunniunnissaannut Naalakkersuisut piginnaatinneqarput. Tunniussinermut atatillugu inuiaqatigiit angallannerluunniit eqqarsaatigalugit isiginiagassat isumagineqarnissaannut Naalakkersuisut piumasaqaatinik aalajangersaasinnappa.

Imm. 3. Ingerlatanik Mittarfeqarfiit ingerlanneqarnerannut ilaasimasunik tigusinissaanik Naalakkersuisut kommune peqqusinnaavaa. Tigusineq Namminersorlutik Oqartussat kommunillu nammagassat suliassallu agguataarneqarnerat pillugu isumaqatigiissutaannut naapertuitissaaq.

§ 8. Mittarfeqarfiit A/S ingerlatseqatigiiffimmut ileqqoreqqusat malillugit suliaminik ingerlatsissaaq.

Imm. 2. Ingerlataqarfiit atuuffiilluunniit avataanit isumagineqartussanngorlugit Mittarfeqarfiit A/S-ip suliariumannittussarsiuussinnaavai.

§ 9. Ingerlatseqatigiiffiup mittarfiutaanik atuinermut akigititassanik Mittarfeqarfiit A/S aalajangersaassaaq.

Imm. 2. Ingerlatseqatigiiffiup mittarfiutaanik atuinermut akigititat akigititanullu tunngaviit Mittarfeqarfiit A/S-ip ingerlatsinera tamarmiusoq aamma § 3, imm. 2-mi § 8, imm. 1-imilu tunngavissat tunngavigalugit aalajangersarneqartassapput.

Imm. 3. Naatsorsuuserinerimi nalinginnaasumik tunngavissat malillugit Mittarfeqarfiit A/S mittarfinnut ataasiakkaanut naatsorsuusiorlunilu missingersuusiusaaq. Nalinginnaasumik ingerlatsineq kiisalu aserfallatsaalinerit aningaasaliissuteqarnerillu mittarfiit ataasiakkaat inatsisinut naapertuullutillu ulluinnarni atorneqarsinnaanissaannut pisariaqartut mittarfinnut ataasiakkaanut naatsorsuutini missingersuutinilu pineqarput.

Imm. 4. Aallarnermut akigititat, ilaasunut akigititat, isumannaallisaanermut akigititat, uninnganermut akigititat ammatinsinermullu akigititat taakkunani lu allannguutit kiisalu akikilliliissuteqartarnermut akiliuteqartitsisannginnissamullu tungaviit Naalakkersuisunit akuersissutigineqassapput, taamaattorli imm. 6 takujuk. Akigititanik akigititanullu tunngavinnik akuersissuteqarnermut atatillugu paassisutissat tamaasa Naalakkersuisunit pingaarutilittut isigineqartut Mittarfeqarfiit A/S-ip Naalakkersuisunut nalunaarutigissavai.

Imm. 5. Akigititat akigitanulluunniit tunngaviit imm. 4-mut ilaatinneqartut allangortinneqarnissaannik Naalakkersuisut piumasaqaateqarsinnaapput, taamaattorli imm. 6 takujuk.

Imm. 6. Pisortanut akitsuutini, akileraarutini akiliutigitinneqartartuniluunniit allannguutit Naalakkersuisut akuersitinnagit akigititanut ilanngunneqarsinnaapput. Akigititat tamatuma saniatigut Kalaallit Nunaanni atuisartunut akigitinneqartunut naleqqersuut malillugu ukiumoortumik iluarsiissuteqarfingineqartarsinnaapput Naalakkersuisunut saqqummiussinertaqanngitsumik.

§ 10. Mittarfinni pineqartuni ingerlatsineq, aserfallatsaalialiineq aningaasaliinissarlu pillugit kiffartuussinissamik isumaqatigiissuteqarnikkut ingerlatseqatigiiffiup mittarfiutaani ingerlatsinerup attatiinnarnissaanut Naalakkersuisut Mittarfeqarfiit A/S pisussaaffilersinnaavaat. Kiffartuussinissamik isumaqatigiissutit niuernermi atugassarititaasut tunngavigalugit isumaqatigiissutigineqartassapput.

Imm. 2. Kiffartuussinissamik isumaqatigiissutit ukiunut arlalinnut isumaqatigiissutigineqarsinnaapput ingerlatseqatigiiffiullu mittarfiutaasa qaqugukkulluunniit angallannermut atortulersuutinut tamarmiusunut, pisortat ilaasunik usinillu assartuinerata ingerlanneqarnissaa pillugu Naalakkersuisut suliffeqarfiullu akornanni kiffartuussinissamik isumaqatigiissutit ilanngullugit, ilaasinnaanissaat ikorfartuutaasinnaanissaallu qularnaassallugu.

Imm. 3. Ingerlatsineq, aserfallatsaalialiineq aningaasaliinerillu ilanngullugit mittarfinnut ataasiakkaanut ukiunut arlalinnut missingersuutit tunngavigalugit kiffartuussinissamik isumaqatigiissutit isumaqatigiissutigineqassapput. Piffissamut kiffartuussinissamik isumaqatigiissutip atuuffissaanut ukiunut arlalinnut missingersuutit suliarineqassapput.

§ 11. Ingerlatseqatigiiffiup mittarfiutaanut il.il. aningaasaliissuteqarnissamut immikkut ittumik aningaasaliissuteqarnissamik pisariaqartitsinerit taakkualu aningaasalersorneqarnissaat pillugit niuernermi atugassarititaasut tunngavigalugit isumaqatigiissuteqartarnissanut Naalakkersuisut Mittarfeqarfiit A/S pisussaaffilersinnaavaat. § 10, imm. 2 aamma 3, taamatuttaaq atutissapput.

§ 12. Mittarfeqarfiit A/S tamatuminnga piumasaqartoqartillugu ingerlatseqatigiiffiup mittarfiutai il.il. pillugit kisitsisitigut paassisutissanik assigisaannillu Naalakkersuisunut nassiuassisassaaq.

Sulisut inatsiseqartitsinikkut inissisimancerat

§ 13. Mittarfeqarfiiit ilaani § 2 malillugu Mittarfeqarfiiit A/S-imut akileeqataassutigineqartuni sulisut Mittarfeqarfiiit A/S-imi atorfinitssinneqassapput. Suliffeqarfinnik tunniussisoqartillugu sulisut inatsisitigut inissisimamerat pillugu Inatsisartut peqqussutaat atutissaaq.

Inatsisiliornernut allanut pissutsit

§ 14. Mittarfiit taakkununngalu atatillugu napasuliat, tikittarfiit aallariartortarfiillu, sannavait allaffeqarfiiillu, timmisartunut qulimiguulinnullu iniliat il.il., taakkununnga atatillugu aqqusernit nunaminertanullu pisinnaatitaaffiit kiisalu ingerlatsinermut atortut pigisallu nuunneqarsinnaasut mittarfiit ataasiakkaat ingerlanneqarnerinut ilaasut akileeqataassutigineqarnerannut atatillugu allagaatit, naqitat, uppermarsaatit il.il. pisortanut naqissusiinermut akitsuuserneqassanngillat.”

Inatsisissatut siunnersuummut nassuaatit

Nalinginnaasumik nassuaatit

Inatsisartut inatsisaata kalaallisuuata qallunaatuatalu oqaasertalorsorneqarnermikkut imminnut naapertuunnissaasa qularnaarneqarnissaa allannguutissatut siunnersuutip siunertaraa.

Inatsisissatut siunnersuummi aalajangersakkanut ataasiakkaanut nassuaatit

Nr. 1-imut

Allannguutissatut siunnersuummut nalinginnaasumik nassuaatit innersuussutigineqarput.